



UPA 2026/129
18/6-2026
Vivian Motzfeldt

Nunatsinni namminersorneq pillugu inatsit qanoq nutarterneqarsinnaanera ullutsinnut naleqqussarlugu apeqquaqaat aallaavigalugu siunnersuut.

(Inatsisartunut ilaasortaq, Aqqalu C. Jerimiassen, Atassut)

Inatsisartunut ilaasortap Atassummeersup oqallisissiaanut Demokraatiniik pingaartitatsinnut qujalluta imaattumik oqaaseqaateqassaagut.

Siullertut oqallisissiamik siunnersuuteqartup aallaqqaasiutitut oqariartuutigisaannut isumaqataavugut, avissarfissarsiuungitsumik, akisussaassuseqartumilli siunissarput pillugu sulisariaqartugut, nammitsinnik ineriartorneq sukkassuserisarput piginnaasallu pigisavut aallaavigalugit.

Namminersorneq pillugu inatsit namminerisaminik inatsisaavoq pitsaasoq. Kisianni 2009-mi inatsit pitsaasoq imaangilaq ullumikkut nunarsuarmi nunatsinnilumi allangortumi naleqquttuusooq.

Taamaammat tassaniiginnassanngilagut ingerlaqqittariaqarpugut. Tamannarpiarlu pillugu Naalakkersuisooqatigiit Demokraatit Inuit Ataqtigiit Atassut siunnersuukut aamma (Siumut) Naalakkersuisooqatigiinnissami isumaqatigiisummi immitsinnut pisussaatittugut Danskit Naalagaaffiannut isumaqatigiinninniarnarit aallartisassallugit, suleqatigiinnitta nutaaliaanerusumik nutartikkanillu sinaakkuteqarluni ingerlaqqissinnaaqqullugu.

Isumaqatigiinninniarnissat taakku pingasunik toqqammaveqarput tassaasunik:

- Nunatta aamma Danmarkip akornanni tamakkiisumik naligiinneq, assigiimmik naleqqassuseqartumik inerisaqqinneqassasoq
- Isumaqatigiinninniarnarit siunissami aningaasaqarnikkut suleqatigiinnissamut, kiisalu aningaasalersuinissanut tunngasuteqassasut, ineriartorneq tamatta pisariaqartitarput nunatsinni aamma pisinnaaqqullugu.
- Namminersorneq pillugu inatsit nutarterneqarnissaannut siunnerfeqartumik pilersaarusiortoqassasoq.



Siunnerfik tamanna ataatsimoorupparput, soorlutaaq aamma qulakkeerusukkipput §21 pillugu isumalioqatigiissitaq suliaminik naammassinnissasoq, tamatumap kingorna inatsisartuni partiit tamarmik akuutinneqassasut, siammasissumik katersuuffiusumillu isumaqatigiissusiortoqarsinnaaqullugu.

Siunnersuuteqartup aamma ujartorpaa ataatsimut siunnerfeqaqatigiinnissaq tamannarpiaavorlu uagut aamma ornikkusutarput. Nutaamilli inatsisiliortoqarnissaa utaqqeqaartariaqanngilarput ingerlaqqissinnaaqulluta, siunnersuuteqartup eqqortumik taakkartugaattut, namminersornerput malunnaatilimmik nukittorsarsinnaavarput suliassaqarfiit amerlanerusut nammitsinnik ingerlatilersinnaavagut maannakkut namminersorneq pillugu inatsisip pioreersup iluani, suliaq tamanna aamma ingerlanneqarpoq.

Qinigaaffimmi matumani namminersornerput malunnaatilimmik iliuuseqarfigissavarput suliassaqarfinnik tigusineq ingerlatsilerneq aqutigalugit pilersaarutit eqqortut piviusorsiorlorlu tunngavigalugit. Aamma qulakkeerniarparput suliassaqarfiit tigusavut ilusilersorneqarnermikkut aningaasalersorneqarnermikkullu nunatsinni pisariaqartitat aallaavigalugit suliarineqarnissasut, imaanngitsoq arlaata allamiup najoqqutassatut suliaa aallavigineqassasoq.

Demokraatit siunnersuuteqartoq isumaqatigaat ullumikkut aatsitassarsiornerup iluani aningaasarsiornissatsinnut killilersuutaasut misissoqqissaarneqartariaqartut. Aatsitassat siunissami aningaasarsiornissatsinnut qitiusunut ilaapput, kisianni aatsaat naleqalersitsissapput akisussaassusilimmik piumasaaqatillu uagutsinnut inuiaqatigiinnut iluaqutaasut atorlugit ingerlanneqarpata. Namminersorneq pillugu inatsimmik nutarterineq tamatumani aqutissat allanngueqataasinnaasut ilagilluinnarpaat.

Siunnersuuteqartup aamma apeqqut naligiinnermut tunngasoq qaqqippaa – Pisortani atorfeqartut nunatsinni atugassarititat danmarkimi atugassarititaasunut naleqqiullugit ajornerussanngimmata suliassaqarfiillu suli tigusimanngisagut eqqarsaatigalugit aamma ajornerusumik tighunerini atugassaqartitsiviussanngitsut, tamanna Demokraatit isumaqatigaat. Naalagaaffeqatigiinnerup iluani naligiinneq tassatuaassanngilaq pappiliamit aallavilik, tassaasariaqarpoq inuit atukkamikkut malugisinnaasaat aamma akissarsiami allagartaat qiviaraangamikku, tamanna ilaatigut tunuliaqutaralugu Naalakkersuisooqatigiinni tjenestemandit soraarnerussutisiaasa nunatsinni Danmarkimilu nikingassuteqarnerat aqqiiviginiarlugu suliaqassaagut, naligiinneq tigussaasusariaqarmat. Naggataatigut tunngaviulluinnartoq tassaavoq inuiaat Kalaallit taasinerimikkut namminersorneq eqqussimammasuk. Namminersorneq pillugu inatsit nutarterneqassappat imaluunniit allanngortinneqassappat taava inuiaat



peqataatinneqassapput. Mianersortumik allorassaartariaqarpugut, inuiaat peqataatittariaqarpavut, qulakkeertariaqarparpullu alloriarnerit tigusaqut, siammassissumik tapersorsorneqassasut – Maani inimi aamma inuiaqatigiit akornanni, aatsaat taamaliorutta ineriartorneq piviusoq qajannaatsoq pilersissavarput.

Siunissarput nammitsinnik aaliangigassaraarput, aqqut atugassarput qanorlu sukkatigisumik alloriarniarnerput nammitsinnik toqqagassaraarput, taamatut oqaaseqarluta Demokratit sinnerlugit siunnerfigissaartumik oqallinnissamik kissaassilluta peqataassaagut, oqallilluarisi.

Qujanaq